



27. Oktober 2020

UKA 2020/118,180

**Utoqqalinersiaqarneq pillugu Inatsisartut inatsisaannik nr. 20, 23. november 2015-meersumik UPA2021-imut allanngortitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni pisortanit utoqqalinersianik pisartagaqarsinnaaneq 66-inik ukioqalernermit pisussanngorlugu allanngortinneqarluni.**  
(Partii Naleqqap Inatsisartunut ilaasortaataitai)

**Kalaallit Nunaanni utoqqalinermit pensionisiat tungaviusumik aningaasartaata Qallunaat Nunaanni utoqqalinermit pensionisiat tungaviusumik aningaasartaannut Qallunaat Nunaannilu soraarnerussutisiamik aaqquissuussinerup nalimmassarnissaanut Naalakkersuisut UKA2021-mi siunnersuummik saqqummiusseqqullugit peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaq Peter Olsen, Inuit Ataqtigiit)

Utoqqalinersiaqarneq pillugu siunnersuutit imartuut marluk tassa, Kalaallit Nunatsinni utoqqalinersiaqalersinnaanerup 66-nik ukioqalernermit aallartittarnissaa pillugu Partii Naleqqamiit siunnersuutigineqatoq aammalu Kalaallit Nunatsinni utoqqalinersiat Danmarkimi utoqqalinersiat annertussusaannut naapertuuttussarlugit nalimmassarneqarnissaat pillugu Inuit Ataqtigiinniit siunnersuutigineqartoq taakku ataatsimoortillugit oqaluuserineqatussanngortinneqarsimallutik.

Partii Naleqqamiit siunnersuutini taakkunani marlunni siunnersuuteqartuniit tungavilersuutigineqartut tamaasa paasiluarpavut isumaqatigalugillu. Qularutiginnigilarpummi Inatsisartuni Partiit tamatta siunertarigippat anguniarlugulu Nunatsinni toqqissisimanartumik atugarissaarfiusumillu utoqqalisoqatarnissaa, ukiorpassuarni inuiaqatigiinni sulereersimasut ajunngitsunik atugaqarlutik utoqqalisarnissaat tamatta sulissutigiuartariqarparput.

Siunnersuutigineartunut naalakkersuisut akissuteqaataanni taakkartorneqartut ukiut qassissaat tusalernerpavut, soorlu Nunatsinnigoq arnat angutillu inuuneqqortusiartuinnarmata ukiumininnguit qaangiuppata utoqqaat amerlanerujussuanngussapput, aap tamanna nalunngilluinarparput qujanaqaarlu aamma ullumikkut inunngortartut qanoq amerlatigisartut malinnaaffigaavut aamma toqusartut qanoq amerlatigisut malinnaaffigaavut innuttaasullu ukioqqortussusaat malillugit qanoq amerlatigisut malinnaaffigalutigit. Taamaakkaluartoq aamma naasorsueqqisaartarfiup ukioq manna saqqummiussaani takuneqarsinnaavoq siulittuutigineqartoq ukiunngooq 20-it qaangiuppata Nunatsinni inuttaasut 50.000-tit inulissavaat. Tassa inunngortartut toqusartunut naleqqiullubut ikippallaalissallutik, soorunami aamma tamanna eqqarsaatissivoq takunngittuusaarneqarsinnaanngitsoq. Kisianni utoqqaat sulisinnaasut atorluaneqarpata aamma inuiaqatigiinni ammaqataanerit malunnaatilerujussuusinnaavoq. Aammalu utoqqalinersiutitut akileraarutitigit akilersueqqataanerimikkut sunniuteqarluartussaallutik.



Partii naleqqamiit ajuusaarnartutut isgaarput kalaallit uagut arnat angutillu agguaqatigiissillugu inuuneqqortussuserput aallaavigigaanni angutit ukioq ataaseq marlulluunniit sinnlaarlugit utoqqalinersiuteqartassammata, arnartavullu sivisunerulaartumik. Danskinut naleqqiullata ukiunik quligajannik agguaqatigiissillugu inuunikinnerusarpugut taamaammat nunatsinni utoqqalinersiuteqalersarnerup 2021-imiit 67-inut qaffannagu annerpaamik 66-iniit aallartittarnissaa Partii Naleqqamiit pissusissamisoortutut isigaarput.

Partii Naleqqamiit erseqqissumik oqaatigissavarput maannakkut piffissanngormat utoqqartatta atugarisaasa pitsaanerulersinneqarnissaannut aamma utoqqalinersiat annertussusilersornearnerat eqqarsaatigalugu, Naalakkersuisooqatigiit oqaatigisarpaat Nunarpunngooq aatsaat taama aningaasarissaartigaaq, taamaassimappat qaa utoqqalinersiuteqartarneq ajunngitsumik aaqqiiviginiartigu, taamaaliornikkut aamma ilaqutariit utoqqartallit atugarisaat pitsanngorsassavagut, utoqqaammi ilaquttaminnut isumassuiuartuupput ilaqutanngumik atugarissaarnissaat pisinnaatillutik suleqataaffigiuartaramikku.

Siorna utoqqalinersiutilinnut Inatsisinik naleqqussaasoqarmat utoqqalinersiutillit sulinerikkut saniatigut aningaasarsiorsinnaanerat qaffatsinneqarpoq, aammalu siunertarineqarluni utoqqaat sulisinnaasut sulerusuttullu utoqqalinersiutiminnik ilanngaassivigineqarpallaaratik sulinnarsinnaasarnissaat. Aamma tamanna nuannerpoq eqqortumillu atorineqaruni utoqqarpaalunnik ajunnginnerusumik atugaqartitsilersimassaaq.

Eqqaamassavarpulli ullumikkut utoqqalinersiutaannarnik isumalluuteqartut atugarisaat imaannaanngimmata, ineqarnikkut atugarisat, inuussutissaqarnikkut atugarisat, kalaalimernit akii, nioqqutissat akii, aammalu kallerup inneranut imermullu akit apeqqutaalluinnartarlutik. Tamakku tamaasa eqqarsaatigalugit siunnersuuteqartut siunnersuutaat akueralugit Inatsisartut naammassiniartariqarpaat.

Innuttaasut toqqissisimallutik utoqqalinissaat tamatta anguniarparput, utoqqaat ataqqinartumik inuuneqarnissartik pisinnaatitaaffigaaq, utoqqaat atugaasa oqinnerulernissaat tamatta anguniarparput, utoqqaat ikiortariillit ikiorneqassapput, utoqqaat illui/paaqqinniffii naammattunik inissaqartinneqassapput, utoqqarnik sullissivinni sulisut tamarmik utoqqarnik ataqqinnittumik sullississapput pikkorissartinneqartarlutillu, kikkut tamarmik naligiimmik utoqqalinersiuteqarnikkut pineqarnissaat anguniarneqartariqarpoq, nunatsinni tamarmi utoqqaat pitsaasumik atugassaqarnissaat qulakkeerneqartariqarpoq.

Taamannak oqaaseqarluta siunnersuutit pineqartut tamarmik aapassaaneeraneqannginnerminni Ilaqutarinnermut Peqqissutsimullu Ataatsimiititaliami suliarineqarnissaat innersuussutigaarput.

Jens Napâtsök, Partii Naleraq